



## **FARG'ONA VILOYATI O'ZBEKISTON TUMANI HOKIMINING Q A R O R I**

2022 - yil 17 - dekabr

422-11-161-Q/22

O'zbekiston tuman hokimligi

### **Dafn etish joylarini saqlash qoidalarini tasdiqlash to'g'risida**

“Mahalliy davlat hokimiyati to'g'risida”gi Qonunning 25-moddasi, “Dafn etish va dafn ishi to'g'risida”gi Qonunning 15-moddasi, O'zbekiston Respublikasi Vazirlar Mahkamasining “Dafn etish va dafn ishi to'g'risida”gi O'zbekiston Respublikasi Qonunini amalga oshirish chora-tadbirlari haqida” 2011 yil 4-apreldagi 101-som qarori ijrosini ta'minlash maqsadida,

#### **Q A R O R   Q I L A M A N:**

1. O'zbekiston tuman obodonlashtirish boshqarmasining 2022 yil 25-noyabr kungi 210-sonli xati ma'lumot uchun qabul qilinsin.
2. O'zbekiston tumanida dafn etish joylarini saqlash qoidalari va qabristonlarda dafn etish xizmatlarini ko'rsatish bo'yicha tariflar miqdori ilovaga muvofiq tasdiqlansin.
3. O'zbekiston tuman obodonlashtirish boshqarmasi, sanitariya – epidemiologik osoyishtalik va jamoat salomatligi bo'limi hamda ekoliya va atrof muhitni muhofaza qilish bo'limi va qurilish bo'limi:
  - Tumandagi barcha qabristonlarda dafn etish joylarini saqlash qoidalari bir hilda ijro etilishini;
  - Mazkur qoidalarga belgilangan normalarni aholi o'rtasida keng yoritilishini ta'minlansin.
4. Mazkur qaror tuman hokimligining Yaypan ovozi gazetasining navbatdagi sonida rasman e'lon qilinsin va bir kun muddatda hokimlikning rasmiy veb-saytiga joylashtirilsin.
5. Ushbu qaror rasman e'lon qilingan kundan boshlab kuchga kiradi
6. Mazkur qarorning bajarilishini nazorat qilish O'zbekiston tuman hokimining o'rinosi Sh.Ismoilov zimmasiga yuklatilsin.

Tuman hokimi v.v.b



X.Alijonov

O‘zbekiston tuman hokimining  
2022 yil 17 dekabrdagi  
422-11-161-Q/22-son qaroriga  
1-ilova

## **Farg‘ona viloyati O‘zbekiston tumanidagi dafn etish joylarini saqlash**

### **qoidalari**

#### **I. Umumiy qoidalari**

1. Farg‘ona viloyati O‘zbekiston tumanidagi dafn etish joylarini saqlash qoidalari (keyingi o‘rinlarda – qoidalari) tegishli dafn etish joylarini (keyingi o‘rinlarda – qabriston) va qabr usti yodgorliklari inshootlarini saqlash, ulardan foydalanish tartibini belgilaydi.

2. Qabristonlarni obodonlashtirish, saqlash va ulardan foydalanish, dafn etish xizmatlari ko‘rsatish bo‘yicha bevosita faoliyat Obodonlashtirish boshqarmasi tomonidan viloyatning mahalliy aholisi, shuningdek boshqa millatlar va xalqlarning mavjud an‘analari, urf-odatlari va udumlariga muvofiq amalga oshiriladi.

#### **II. Qabristonlarni saqlash**

3. Qabrlar, sag‘analar, shuningdek dafn etishni amalga oshirishga mo‘ljallangan boshqa binolar va inshootlarni barpo etish uchun ekologik, sanitariya, shaharsozlik va boshqa me’yorlarga hamda mazkur qoidalarga muvofiq ajratilgan yer uchastkalari qabristonlar hisoblanadi. Qabristonlar qonun hujjatlariga muvofiq moddiy madaniy meros ob’ektlari jumlasiga kiritilishi mumkin.

4. Obodonlashtirish boshqarmasiga qabristonlarni zarur darajada saqlash, ulardan foydalanish, dafn etish xizmatlarini ko‘rsatish, obodonlashtirish bo‘yicha vazifalarni bajarish majburiyati yuklanadi.

5. Har bir qabriston qonun hujjatlariga muvofiq belgilangan me’yorlar bo‘yicha tegishli xodimlarga ega bo‘lishi kerak.

6. Obodonlashtirish boshqarmasi tomonidan qabristonlarni obodonlashtirish, mukammal va joriy ta’mirlash, ularni zarur darajada saqlash mahalliy byudjet mablag‘lari hisobidan amalga oshiriladi.

Qabristonlarni saqlash va obodonlashtirishda, Obodonlashtirish boshqarmasi bilan kelishilgan xolda, yuridik va jismoniy shaxslarning ixtiyoriy xayr-ehsonlaridan va fuqarolarning o‘zini o‘zi boshqarish organlari ko‘magida hashar yo‘li bilan o‘rnataligan tartibda foydalanish mumkin.

7. Qabristonning nomi aks ettirilgan asosiy kirish joyida (ichki tomonida) quyidagilar o‘rnataladi:

ma’muriy va boshqa binolar, yo‘llar, xiyobonlar, tarixiy va memorial qabrlar, umumiy foydalanish hojatxonalari va boshqa ob’ektlarning joylashishi belgilangan holda qabristonning sxematik tarxi;

qabristonning ish jadvali (ziyorat qilish qoidalari) va boshqa yo‘l-yo‘riq hujjatlari qo‘yilgan ko‘rgazma taxta;

fuqarolarga xizmat ko‘rsatish boshqarmasi rahbariyati, qabriston uchun mas’ul bo‘lgan xodimlar va aloqa bog‘lash telefonlari, qabr qazish va dafn etish xizmatlari uchun tariflar hamda mazkur qoidalari ko‘rsatilgan ma’lumotlar.

8. Qabristonlar har kuni ziyyaratlar va dafnlar uchun ochiq bo‘lishi kerak.

9. Qabriston hududida quyidagilar taqiqlanadi:

jamoat tartibi va sokinlikni buzish, mast-alast, giyohvandlik va boshqa xil narkotik moddalar ta’siri holatida bo‘lish;

qabr usti yodgorliklariga va yashil o‘simgulkarga shikast yetkazish;

quruq o‘t, barg, shox-shabbalarni yoqish;

mevali ko‘chatlar o‘tkazish;

mol va boshqa uy jonivorlarini boqish;

qishloq xo‘jaligi ekinlarini o‘stirish;

qabristonlarga transport vositasida kirish (nogiron va keksalarni, qabriston uchun zarur jihoz va buyumlarni olib kirish bundan mustasno).

10. Qabristonning mas’ul xodimlari, dafnlarni va o‘rnatalayotgan qabr usti yodgorliklarini raqamlangan va ip bilan tikilgan hamda Fuqarolarga xizmat ko‘rsatish boshqarmasi tomonidan muhrlangan daftarlarga qayd etishlari, shuningdek elektron bazani yuritish uchun Fuqarolarga xizmat ko‘rsatish boshqarmasiga ma’lumot taqdim etishlari shart.

Dafn etishni amalga oshirish huquqini beradigan barcha hujjatlar — fuqarolik holati dalolatnomalarini qayd etish organlari tomonidan beriladigan o‘lim haqidagi ma’lumotnomasi, avvalda dafn etilgan yaqin qarindoshlarning o‘lganlik to‘g‘risidagi tegishli hujjatlar nusxasi, dafn etuvchi jismoniy yoki yuridik shaxsning arizasi, belgilangan tartibda tikilishi va saqlanishi kerak.

Fuqarolik holati dalolatnomalarini qayd etish organlari tomonidan beriladigan o‘lim haqidagi ma’lumotnomasi Fuqarolarga xizmat ko‘rsatish boshqarmasi arxivida saqlanishi shart.

11. Fuqarolarga xizmat ko‘rsatish boshqarmasi va qabristonning mas’ul xodimlari quyidagilarni ta’minalashi shart:

qabriston hududida zarur darajadagi tartibni ta’minalash va mazkur qoidalari hamda boshqa tegishli qonun hujjatlarining talablarini qat’yan bajarish;

bosh xiyobon, asosiy va ikkinchi darajali yo‘llarda to‘siqsiz yurish va o‘tish imkoniyatini (qishda qordan tozalash, muzni parchalash, qum sepish, yozda o‘rilgan o‘tlarni o‘z vaqtida olib ketish va shu kabilarni) ta’minalash;

eskirgan (qurigan) daraxtlarning ag‘darilishi va qabr usti yodgorliklarini shikastlashiga yo‘l qo‘ymaslik uchun ularning o‘z vaqtida kesilishini ta’minalash ishlari Tabiatni muhofaza

qilish organlari xulosasi va qabriston joylashgan tuman hokimining qaroriga asosan amalga oshirish;

umumiyl foydalanish joylarini toza saqlash, qabristondan chiqqan chiqindilar uchun maxsus yashik va qutilar o'rnatish hamda chiqindi to'plash joylari tashkil etish, chiqindilarni qabriston hududidan o'z vaqtida olib chiqilishini ta'minlash;

muhandislik inshootlarining zarur darajada ishlashini ta'minlash, tashqi to'siq, bino va inshootlar, yo'llar, muhandislik tarmoqlari va inshootlarining joriy va mukammal ta'mirlanishini amalga oshirish hamda ko'kalamzorlashtirish;

barcha turdag'i yashil o'simliklarni sug'orish va parvarishlashni ta'minlash, ularni yangilash;

jismoniy va yuridik shaxslarning buyurtmanomalariga ko'ra dafn uchun ushbu qoidalar bilan belgilangan o'lchamda joy (uchastka) bepul berish;

marhumlarni qabr qazish me'yorlari va qoidalariga rioya etgan holda dafn etishni ta'minlash;

qabrning ro'yxat raqami ko'rsatilgan beton ustuncha o'rnatish;

anjomlarning (belkurak, panshaxa, paqir, xokandoz, supurgi, zambil va hokazolarning) yetarli miqdorda bo'lishini va ularning fuqarolarga qabrlarga qarash uchun bepul til xat bilan berilishini ta'minlash;

qabristonda zarur darajadagi tartibni ta'minlash bo'yicha, shu jumladan, xotirlash kunlari, umumxalq hasharida qabrlarni suvash va boshqa tadbirlarni tashkil etishda fuqarolarning o'zini o'zi boshqarish organlari bilan hamkorlik qilish;

xizmatlar uchun O'zbekiston tumani xokimi qarori bilan belgilangan tariflar bo'yicha hisob-kitob qilgan holda jismoniy va yuridik shaxslarning qabristonda ko'rsatiladigan xizmatlarga doir buyurtmalarini o'z vaqtida va sifatli bajarish;

qabr usti yodgorliklarini o'rnatish tartibiga binoan ularning o'lchamlarini, hududni ko'kalamzorlashtirish uchun daraxt va butalarning turlarini to'g'ri tanlashga rioya etilishini nazorat qilish;

dafn etilganning qarindoshlariga ta'mir talab qabr usti yodgorligi to'g'risida yozma xabar qilish va uni tuzatishni talab qilish;

go'r qazuvchi ishchilarga sanitariya qoidalarini hamda diniy va mahalliy an'analarni hisobga olib, me'yorlarni qat'iyan bajargan holda ishlarni bajarishning xavfsiz usullarini o'rgatishni tashkil qilish;

qabr usti yodgorliklarining saqlanishini ta'minlash, ular o'g'irlangan, buzilgan, vayron qilingan taqdirda huquqni muhofaza qilish organlarini  
va yodgorliklarning egalarini xabardor qilish;

yong'in xavfsizligi qoidalariga rioya etilishini ta'minlash, yong'inga qarshi zarur

miqdordagi anjomlar bilan butlash;

qabristonning butun hududini — qabrular usti bilan har yili kamida ikki marta (Xotira kuni va diniy bayramlar arafasida) har tomonlama supurib-sidirishni amalga oshirish.

12. Qabriston xizmatlaridan foydalanuvchi jismoniy va yuridik shaxslar quyidagi huquqlarga ega:

tegishli diniy konfessiya qabristonida vafot etgan yaqinlari  
va qarindoshlarini dafn etish uchun ushbu qoidalar bilan belgilangan o‘lchamda bepul joy  
(uchastka) olish;

sanitariya qoidalari hamda boshqa qoidalar va me’yorlarga zid bo‘lmagan diniy  
marosimlar va mahalliy an’analarga rioya etgan holda dafn etish udumini bajarish;

marosim xizmatlaridan foydalanish va ularga O‘zbekiston tuman xokimi qarori bilan  
tasdiqlangan miqdordagi tariflar bo‘yicha haq to‘lash;

buyurtirilgan xizmatlarning o‘z vaqtida va sifatli bajarilishini qabriston ma’muriyatidan  
talab qilish;

qabrga va qabr usti yodgorliklariga qarash uchun qabriston anjomlaridan bepul  
foydalanish;

Obodonlashtirish boshqarmasi bilan kelishgan holda yaqinlari  
va qarindoshlarining qabrlariga ushbu qoidalar bilan belgilangan o‘lchamda qabr usti  
yodgorliklarini o‘rnatish.

### **III. Qabrlarni saqlash va qabr usti yodgorliklarini o‘rnatish**

13. Dafn etishni amalga oshirgan jismoniy va yuridik shaxslar qabrlar hamda qabr usti  
yodgorliklarini zarur holatda saqlashi shart (cho‘kkan qabr va yodgorlik xamda lavhalarni  
tiklash, qabrlarni suvash, yaroqsiz yodgorliklarini olib tashlash va x.k.).

14. Fuqarolarga xizmat ko‘rsatish boshqarmasi va qabristonning mas’ul xodimlari bilan  
kelishgan holda, dafn etilgan joy (uchastka) doirasida, uzunligi 1,5 metr, eni 1 metr va balandligi  
0,5 metr (qabr ustidagi tuproq tepaligi balandligi darajasida), yozuvlar uchun vertikal plitaning  
balandligi 1 metrgacha bo‘lgan o‘lchamda qabr usti yodgorliklarini o‘rnatishga (ko‘rishga) yo‘l  
qo‘yiladi.

15. Qabr atrofiga metall va boshqa ashyolardan yasalgan to‘sislarni o‘rnatish, qo‘sni  
qabrlarning hududlarini va bo‘sh joy (uchastka)larni egallab oladigan qabr usti yodgorliklarini  
barpo etish taqiqlanadi.

16. Byustlar, haykaltaroshlik yodgorliklari yoki alohida arxitektura shakliga ega bo‘lgan  
inshootlarni o‘rnatishga faqat loyiha-smeta hujjatlari hamda Tuman xokimining qarori asosida  
ruxsat beriladi.

17. Qabr usti yodgorliklarining joylashtirilishi, shuningdek daraxt  
va butalar o‘tzazish ishlarini amalga oshirishdan avval ma’muriyatini bilan kelishiladi.

18. Qabr usti yodgorliklarining o‘rnatilishi qabristonning mas’ul xodimlari tomonidan qabr usti yodgorliklarini ro‘yxatdan o‘tkazish daftarida ro‘yxatdan o‘tkazilib, unda qabr joylashgan chizma (xarita), qatori va raqami, dafn etilgan kishining familiyasi, ismi-sharifi, yodgorlik o‘rnatilgan sana, yodgorlikning qisqacha tavsifi (yodgorlikning hajmi, rangi va ko‘rinishi haqidagi ma’lumotlar), uni o‘rnatgan shaxslarning manzili, familiya, ismi shariflari ko‘rsatiladi.

19. Barcha qabr usti yodgorliklari ularni o‘rnatgan jismoniy va yuridik shaxslarning mulki hisoblanadi.

20. Fuqarolarga xizmat ko‘rsatish boshqarmasi tashabbusi bilan qabr usti yodgorliklarini buzib tashlashga yo‘l qo‘yilmaydi, eskirib ketgan qabr usti yodgorliklarini egalari tuzatishdan bosh tortgan, ular belgilangan tartibda egasiz deb topilgan hollar bundan mustasno.

Qabr usti yodgorliklarini buzib tashlash, Obodonlashtirish boshqarmasi ko‘rsatmasiga asosan qabr usti yodgorliklarining elementlari albatta tavsiflangan, qabriston joylashgan hududdagi o‘zini o‘zi boshqarish organi bilan kelishilgan buzib tashlash dalolatnomasi asosida, qabriston xodimlari tomonidan amalga oshiriladi.

#### **IV. Dafn etish tartibi**

21. Dafn etish – marhumning jasadini va saqlab qolingga tana qismlarini sanitariyaga oid hamda boshqa me’yorlar va qoidalarga zid bo‘lmagan urf-odatlar va an’analarga muvofiq yerga ko‘mish yo‘li bilan amalga oshiriladi. Dafn etish muayyan diniy konfessiya qabristoni hududida bajariladi.

22. Marhumni dafn etish er (xotin), ota-on, farzandlar va boshqa qarindoshlar yoki marhumning qonuniy vakili, bunday shaxslar bo‘lmasa – zimmasiga dafnni amalga oshirish majburiyatini olgan boshqa shaxsning arizasiga asosan amalga oshiriladi.

23. Dafn etishga ruxsatni qabristonning mas’ul xodimi faqat fuqarolik holati dalolatnomalarini qayd etish organlari tomonidan berilgan o‘lim to‘g‘risidagi ma’lumotnomaga taqdim etilganidan keyingina beradi.

24. Dafn etish uchun joy (uchastka) marhum ishlab turgan, yashab turgan yoki ro‘yxatda turgan hududdagi qabristonlardan bepul va qat’iyan sanitariyaga doir va boshqa qoidalari hamda me’yorlarga muvofiq ajratiladi.

Istisno tariqasida, marhumning xohish irodasini bajarish maqsadida qarindoshlarning roziligi bilan uni qabriston muddati (tuproq xususiyatiga qarab 10 – 20 yil) tugagan yaqin qarindoshlari qabriga dafn etish mumkin, bunda qarindoshligini tasdiqlovchi hujjatlar (tug‘ilganlik, nikoh va o‘lim to‘g‘risidagi guvohnomalar) taqdim etiladi.

Oilaviy va mahallalar uchun alohida joy (uchastka)lar (xilxona) ajratilishiga yo‘l qo‘yilmaydi.

25. Qabristonning mas’ul xodimlari har bir dafn etishda ro‘yxatdan o‘tkazish daftariga quyidagi ma’lumotlarni qayd etadilar:

dafn etish yili, oyi, kuni;  
qabr joylashgan chizma (xarita), qatori va raqami;  
familiya, ism-sharif, yashagan manzili;  
tug‘ilgan yil, oy va kun;  
o‘lim sababi va uning yil, oy va kuni;  
o‘lim to‘g‘risidagi hujjatning sanasi va kim tomonidan berilganligi;  
marhumning qarindoshlari yoki qonuniy vakilining, agar bunday shaxslar bo‘lmasa — zimmasiga dafn etish majburiyatini olgan boshqa shaxsning familiyasi, ismi-sharifi, manzili.

26 Dafn etilgan shaxslarni saqlanib qolgan tana qismlarini olish va ularni yangi joyga olib o‘tish mumkinligi haqidagi Sanitariya-epidemiologik osoyishtalik va jamoat salomatligi boshqarmasining xulosasiga asosan, qumloq  
va kam tuproqli joy (uchastka)larda dafn etilgandan keyin kamida bir yil o‘tgach, chirish va mineralga aylanish jarayonlari sekin bo‘ladigan nam tuproqlarda esa — kamida uch yil o‘tgach yo‘l qo‘yiladi. Bu ish Obodonlashtirish boshqarmasi vakillari va manfaatdor shaxslar ishtirotkida amalga oshiriladi. Dafn etilgan shaxslarni ko‘chirib, qayta dafn etish yilning sovuq vaqtida, kunduzi, amalga oshirishi tavsiya qilinadi.

Saqlanib qolgan tana qismlarini olish va qabrni tugatish to‘g‘risida qabristonning dafnlarni ro‘yxatdan o‘tkazish daftariga tegishli belgi qo‘yiladi.

27. Eksgumatsiya – O‘zbekiston Respublikasining Jinoyat-protsessual kodeksida belgilangan tartibda amalga oshiriladi.

Qabriston go‘rkovlari eksgumatsiya jarayonida qabrni lahadgacha (tobut qopqog‘igacha) ochib berish va ochilgan joy (uchastka)ni qayta ko‘mish ishlarini amalga oshiradi.

28. Vafot etgan shaxsning eri (xotini), ota-onasi, farzandlari va boshqa qarindoshlari yoki qonuniy vakili yoxud zimmasiga dafn etish majburiyatini olgan boshqa shaxs bo‘lмаган taqdirda ichki ishlar organlari tomonidan marhumning shaxsi aniqlanganidan keyin uni dafn etish, shuningdek shaxsi ichki ishlar organlari tomonidan aniqlanmagan marhumni dafn etish qonun hujjatlarida belgilangan muddatlarda Fuqarolarga xizmat ko‘rsatish boshqarmasi tomonidan sud-tibbiy ekspertiza davlat muassasalari bilan tuzilgan shartnoma asosida, mahalliy byudjet mablag‘lari hisobiga amalga oshiriladi.

## **V. Qabrlarning tuzilishi**

29. Dafn etishlar faqat ishlab turgan qabristonlarda, mahallalarga va oilalarga joy (uchastka)lar (xilxonalar) ajratilmagan xolda, navbat tartibida qator qilib amalga oshiriladi.

30. Har bir marhum alohida qabrga dafn etiladi. Qabrlar oralig‘idagi masofa uzun tomonlari bo‘yicha 1 metrdan, qisqa tomonlari bo‘yicha esa — 0,5 metrdan ko‘p bo‘lmasligi kerak.

31. Har bir alohida qabr uchun o‘lchami o‘rtacha 2x1 m bo‘lgan joy (uchastka) ajratiladi.

Qabrning o‘lchamlari:

a) musulmon qabrlar uchun:

ayvon chuqurligi 1,20 — 1,30 m., kengligi 1x1 m., lahad og‘zi 0,4 — 0,5 m., chuqurligi 2,2 — 2,3 m.;

b) yevropa millatiga mansub qabrlar:

uzunligi -2m., kengligi -1m., chuqurligi -tobut qopqog‘igacha -1,5m.;

v) vafot etgan bolalarni dafn etishda qabr uchun joy (uchastka)ning o‘lchamlari tegishli ravishda kamaytirilishi mumkin.

32. Har bir qabr ustidan (“sag‘ana” dan tashqari) yer sathidan 0,5 metr balandlikda tuproq ko‘tarma (tepacha) (ko‘tarma qabrn ni yer usti suvlaridan himoya qilish uchun undan chetga chiqishi kerak) yoki qabr usti plitasi bo‘lishi kerak.

Er sathida “sag‘ana” ko‘rinishida barpo etiladigan musulmon qabrlari (er osti suvlari sathi yuqori bo‘lganda) yer usti suvlar va atmosfera yog‘inlaridan himoyalangan bo‘lishi kerak, buning uchun himoya qatlami barpo etilishi kerak va “sag‘ana” o‘lchamlarining yer sathida bo‘yiga ko‘ra 2,5 metrgacha, eni bo‘yicha

1,5 metrgacha va “sag‘ana” asosidan boshlab balandligi 1,5 metrgacha bo‘lishiga yo‘l qo‘yiladi, yozuvlar uchun qabr ustidagi vertikal plita balandligi 1 metrgacha bo‘lishi lozim.

33. Har bir qabr tepachasiga dafndan so‘ng majburiy tartibda beton ustuncha o‘rnatilib, unda mazkur qabristonning dafnlarni ro‘yxatdan o‘tkazish daftaridagi yozuvga muvofiq dafnning ro‘yxatdan o‘tkazish raqami ko‘rsatilishi kerak.

## **VI. Qabriston hududini tashkil etish**

34. Qabristonning butun hududi o‘ralgan bo‘lishi kerak. Qabristonlar, odatda, serob mahalliy materiallardan (yig‘ma temir-beton, g‘isht, shlakoblok, arralangan va bo‘laklangan toshlar, paxsa va boshqalardan) tiklangan, balandligi

2 metrdan past bo‘lmagan, mustahkam to‘sinqqa (devorga) ega bo‘lishi lozim. Qabristonning belgilanmagan joylaridan o‘tish yo‘llarini ochish qat’iyan taqiqlanadi.

35. Qabristonning o‘lchamiga bog‘liq holda uning hududida quyidagi bino va inshootlar bo‘lishi mumkin:

ma’muriy bino;

xo‘jalik imoratlari (omborxonalar);

jamoat hojatxonalar;

ishchilar uchun xona;

ishchilar uchun yuvinish xonalari;

marosim udumlari uchun bostirma va maydonchalar;

tobut va anjomlar saqlanadigan xonalar;

o‘rindiqlar, axlat qutilari va boshqalar.

36. Qabristonning ma’muriy binosi uning hududida, asosiy kirish joyi yaqinida bo‘lishi kerak.

37. Dafn etish uchun va qabrni ziyorat qilishga mo‘ljallangan narsalar (gullar va boshqalar)ni sotish, odatda, qabristonga kiriladigan asosiy eshik yonida tashkil qilinadi.

38. Barcha qabristonlar telefon aloqasiga ega bo‘lishi zarur.

39. Qabriston hududi ziyoratchilar va xizmat ko‘rsatuvchi xodimlar tomonidan yashil o‘simgulkarni sug‘orish, maishiy ehtiyojlarini to‘liq ta‘minlashga yetarli miqdorda suv bilan ta‘minlangan bo‘lishi kerak.

Suv ta‘minoti suv quvuri tarmog‘iga ularish, qabriston hududi yaqinida maxsus quduqlar qazish, nasos qurilmasi o‘rnatish va yashil o‘simgulkarni sug‘orish uchun sug‘orish suv quvuri yoki irrigatsiya tizimlarini barpo etish yo‘li bilan, mavjud imkoniyatlardan kelib chiqib o‘rnatilgan tartibda hal qilinishi mumkin.

Ayrim hollarda xo‘jalik-ichimlik suvi ehtiyojlari va sug‘orish uchun suv ta‘minoti suv tashish usuli bilan hal etilishi mumkin.

Qabristonlar hududidan xo‘jalik-ichimlik suvi quvuri va suv tarmoqlari hamda boshqa muhandislik-kommunikatsiya magistral tarmoqlarini o‘tkazish qat’yan taqilanganadi.

40. Katta qabristonlar hududida suvni ochiq manbalardan (daryolar, ko‘llar, kanal va ariqlardan) va yopiq suv manbalaridan (artezian quduqlardan) suv oladigan sug‘orish suv quvuri tarmog‘ini o‘rnatish, zarur hollarda sug‘orish maqsadlari uchun metall suv sig‘imlari va ochiq ehtiyoj rezervuarlari (havzalar) barpo etish tavsiya qilinadi.

41. Qabriston hududi majburiy tartibda elektr energiyasi bilan ta‘minlanishi kerak.

Qabristonlarda kirish joyi (eshigi), bosh xiyobonlar va asosiy yo‘llar yoritilgan bo‘lishi lozim.

## **VII. Yakunlovchi qoidalar**

42. Mazkur qoidalar talablarining buzilishida aybdor bo‘lgan shaxslar belgilangan tartibda javob beradilar.

O‘zbekiston tuman hokimining  
2022 yil 17 dekabrdagi  
422-11-161-Q/22-son qaroriga  
2-ilova

**Farg‘ona viloyat, O‘zbekiston tumanidagi qabristonlarda dafn etish xizmatlarini ko‘rsatish bo‘yicha tariflar miqdori**

*so ‘m*

T\rl	Xizmat turi	O‘lchov birligi	Bazaviy hisoblash miqdoriga nisbatan (% xisobidan)
1.	Go‘r qazish (diniy mansubligidan qat’iy nazar katta o‘lchamda)	1 o‘ringa	50 %
2.	Go‘r qazish (diniy mansubligidan qat’iy nazar kichik o‘lchamda)	1 o‘ringa	40 %
3.	Go‘r qazish (diniy mansubligidan qat’iy nazar 3 yoshgacha o‘lchamda)	1 o‘ringa	bepul
4.	Maxsus mashinalarda xizmat ko‘rsatish	1 kunga	25 %
5	Maxsus nomerlangan ustunchalar tayyorlash	1 o‘ringa	5 %
6	Qabrga va qabr usti yodgorliklariga qarash uchun qabriston anjomlaridan foydalanish	1 o‘ringa kunga	bepul

Izox: Tumandagi qabristonlarda dafn etish xizmatlarini ko‘rsatish bo‘yicha ta’riflar miqdori O‘zbekiston Respublikasi Prezidentining bazaviy hisoblash miqdorini belgilash bilan bog‘liq amaldagi farmonlarida ko‘rsatilgan miqdorga nisbatan foiz ulushida belgilanadi. Bazaviy hisoblash miqdori ortishiga qarab mutanosib ravishda dafn etish xizmatlarini ko‘rsatish bo‘yicha tariflar miqdori xam ortadi.